

25 JAN 2000

Najib-Elaun

SEBANYAK 37 ELAUN ATM SEDANG DIKAJI, KATA NAJIB

KUALA LUMPUR, 25 Jan (Bernama) -- Angkatan Tentera Malaysia (ATM) telah memohon kepada kerajaan supaya 37 bentuk elaun yang diberi kepada anggotanya sekarang dikaji semula sesuai dengan keperluan dan keadaan semasa.

Menteri Pertahanan Datuk Seri Najib Tun Razak hari ini berkata pada mulanya terdapat 44 elaun kesemuanya dengan tujuh daripadanya telah dimansuhkan.

Ada di antara elaun itu dilaksanakan sejak tahun 60an dan masih digunapakai sehingga hari ini walaupun telah ketinggalan zaman serta perlu diubahsuai.

"Kerajaan tidak akan meminggirkan masalah ATM. Sebaliknya ia akan terus beri tumpuan supaya soal kebajikan anggota-anggota terus diperjuangkan sehingga dapat meningkatkan semangat dan menjadikan ATM sebagai sebuah angkatan yang berwibawa," katanya mengulas ucapannya pada majlis sambutan Hari Raya bersama Pegawai Tak Tauliah ATM (NCO) di Wisma Bintara di sini.

Najib berkata terdapat banyak kategori elaun dalam ATM seperti elaun kemahiran teknikal, elaun tugas-tugas khas, elaun perjalanan dan elaun tugas berisiko tinggi.

Ditanya bila kali terakhir elaun-elaun ini dikaji, Najib berkata ia dikaji dari semasa ke semasa, umpamanya elaun perumahan kira-kira lima tahun lepas.

Ketika berucap Najib berkata beliau akan berjumpa dengan Perdana Menteri Datuk Seri Dr Mahathir Mohamad sedikit masa lagi berkenaan hal elaun itu.

Katanya beliau akan memberi tumpuan kepada pembangunan ATM berdasarkan pembangunan yang total, bersepadu dan komprehensif bagi melahirkan satu angkatan yang berwibawa, profesional serta mewujudkan sistem pertahanan yang setimpal dengan status negara maju pada 2020.

"Saya amat yakin ATM sebagai angkatan tentera yang berdisiplin adalah sentiasa berdiri di belakang kerajaan yang mendapat kepercayaan dari rakyat," katanya.

Najib berkata beliau telah mencadangkan kepada Lembaga Tabung Angkatan Tentera (LTAT) agar mewujudkan sebuah yayasan bagi membantu anak-anak warga tentera yang berpotensi melanjutkan pendidikan di peringkat tinggi selain membina rumah yang mampu dibeli warga tentera.

Semasa menjawab beberapa soalan yang dikemukakan pada sesi dialog dengan kira-kira 1,000 pegawai Tak Tauliah itu, Najib berkata beliau telah mengarahkan satu kajian menyeluruh mengenai peluang pendidikan kepada anggota ATM, pengiktirafan kepada lulusan teknologi maklumat serta soal pemberian biasiswa dan pinjaman.

Najib juga ditanya mengenai pembinaan kampus Akademi Tentera Malaysia (ATMA) di Sungai Besi yang dimulakan pada September 1996 tetapi masih belum siap walaupun dijadualkan siap pada awal tahun lepas.

"Ada sedikit masalah dari segi kemampuan kontraktor terutama segi kewangan. Tetapi saya difahamkan kontraktor sudah mendapat pinjaman tambahan dan projek ini boleh disambung semula," katanya.

Mengenai Pusat Latihan Rekrut (Pularek) Tentera Laut Diraja Malaysia di Tanjung Pengelih, Johor, yang mengalami kerosakan besar, Najib berkata ia disebabkan oleh kegagalan kontraktor dan penyeliaan yang rapuh.

Katanya beliau sedang menyediakan laporan terperinci mengenainya dan akan dikemukakan kepada kabinet.

-- BERNAMA
RV RON